

समां - 12:25 hrs.

<><><><><><>

Cabinet Meet

जम्मू-कश्मीर कैबिनेट दी अज्ज लग्गी दी बैठक च केई प्रस्तावें पर मुकदा फैसला लैता गया जिंदे च असैम्बली दा अगला इजलास सद्दने बारे उपराज्यपाल हुंदे अग्ले सफारश करने दा प्रस्ताव बी शामिल ऐ। आकाशवाणी दे जम्मू संवाददाता नै जानकारी दिती ऐ जे मुखमंत्री उमर अब्दुल्ला हुंदी अध्यक्षता च मंत्रीमंडल दी बैठका च एल.जी होरें गी असैम्बली दा ऑटम सेशन सददने बारे प्रस्ताव रखेया गया जेहदे च 13 कोला 20 अक्तूबर तोड़ी असैम्बली दा इजलास सददने दी सफारश कीती गेई ऐ। जम्मू-कश्मीर पुर्नगठन कनून 2019 मुजब विधानसभा दे दंऊ इजलासें बश्कार 6 महीने कोला मता वक्फा नेही होना लोड़चदा। यानि पिच्छले इजलास दी खीरी बैठक ते अगले इजलास दी पैहली बैठक बश्कार एहू वक्फा 6 महीने कोला घट्ट होना लोड़चदा।

<><><><><><>

CM- Delegation

मुखमंत्री उमर अब्दुल्ला होरें भारत CSR नेटवर्क ते सर्कुलर इकोनॉमी एलायंस आस्ट्रेलिया दे प्रधान ते संस्थापक साजिद सैयद हुंदी नुमायंदगी च कल भारत –आस्ट्रेलियाई प्रतिनिधिमंडल कन्नै मलाटी लाई। मलाटी दौरान जम्मू-कश्मीर च सतत विकास गी बढ़ावा देने दे मकसद कन्नै कारपोरेट सामाजिक जिम्मेदारियें कन्नै सरबंधत परियोजनाएं दी इक्क लड़ी पर गल्ल-कत्थ कीती गेई। प्रतिनिधिमंडलै सामुदायिक सशक्तिकरण ते पर्यावरणीय स्थिरता गी बढ़ावा देने तांई नेकें पहलकदमियें दा प्रस्ताव रखेया-जिंदे च स्मार्ट ग्राएं दी स्थापना- AI लबाट्रियां खडेरना-कूड़े-कचरे थमां रुपे-पैहा कमाने सरबंधी कार्यक्रमें गी लागू करना- जल-उपचार परियोजना रम्भ करना ते हाड़ें कन्नै प्रभावत लोकें गी पुर्नवास मदाद उपलब्ध करोआना शामिल ऐ। प्रस्तावें दा सोआगत करदे होई मुखमंत्री होरें समावेशी विकास बक्खी प्रतिनिधिमंडलै दी सराहना कीती ते सहयोग तांई प्राथमिकता आहले क्षेत्रें दी निशानदेई बी कीती।

<><><><><><>

Ayurveda Day

अज्ज 10मां राश्ट्रीय आयुर्वेद दिवस मनाया जा रदा ऐ। मुख आयोजन दा सरिस्ता अखिल भारतीय आयुर्वेद संस्थान AIIM गोवा च कीता गेदा ऐ। इस समारोह दा उदघाटन केन्द्रीय आयुष राज्यमंत्री स्वतंत्र प्रभार

प्रताप राव जाधव होर करगंन। इस मौके पर केन्द्रीय ऊर्जा मंत्रालय ते अक्षय ऊर्जा मंत्रालय दे राज्यमंत्री श्रीपद येसो नाइक होर बी मौजूद रौहगंन। इस बरे आयुर्वेद दिवस दा विशे सार ऐ- “आयुर्वेद जन-जन आस्तै-आयुर्वेद धरती आस्तै”। इस मौके पर आयुर्वेद दे क्षेत्र च टकोहदा योगदान देने आहलें गी राष्ट्रीय धन्वंतरि आयुर्वेद पुरस्कार -2025 बी प्रदान कीते जागंन।

<><><><><><>

Seva Parv- Informal Sec

मुख्य भरै च चलै करदी “सेवा पर्व” आहली पैहल तैहत अज्ज अस्स गल्ल करने आं मोदी सरकार दे कल्याणकारी उपाएं-समाजी सुरक्षा ते माली समावेशन आहलियें पैहलकदमियें दी- जिन्दे राएं अनोपचारिक क्षेत्र गी निगगर बनाने दे जतन कीते गेन।

असेंगी पता होना लोड़चदा जे देसै दे सकल घरेलू उत्पाद यानि GDP च अनोपचारिक क्षेत्र दा जोगदान लगभग 45 प्रतिशत ऐ जिसी अनदिक्खा नेही कीता जाई सकदा ते इस्सै गल्लै गी ध्यानै च रखदे होई इस क्षेत्र दे सशक्तिकरण बक्खी चेचा ध्यान दिता जा रदा ऐ। सरकारै असंगठित क्षेत्र च कम्म करने आहलें गी सशक्त बनाने दी जिम्मेवारी अपने सिर पर लैती। रेहड़ी-फड़ी आहलें लेई “पी.एम. स्ट्रीट वेंडर्स आत्मनिर्भर निधि स्कीम” तैहत दिते जाने आहले फायदें च डिजिटल तरीके कन्नै अदायगी करने आहलें गी कैश-बैंक दी सुविधा बी दिती जन्दी ऐ।

<><><><><><>

Sewa Parv –GCW Parade

जम्मू दे परेड आहले सरकारी महिला कालेज च “सेवा पर्व” बड़े मते उत्साह ते जोश-जज्वे कन्नै मनाया गया। इस मौके पर बोलदे होई कार्यक्रम दे मुख्ख परौहने-उच्च शिक्षा विभाग च अतिरिक्त मुख्ख सचिव शांतमनु होरें सेवा-अनुशासन ते समाज दे प्रति जिम्मेदारी जनेए गुणें लेई कालेज दी सराहना कीती। उनें आखेया जे इस चाली दियां पैहलां नां छड़ा नोजवानें अंदर समाज दे प्रति जिम्मेदारी आहली सोच ते जज्वें गी मजबूती दिंदियां न-सगुआं समुदायिक विकास दे प्रति उच्च शिक्षा दे इदारे दी इक अग्रदूत दी भूमिका गी बी उजागर करदियां न। कालेज दे प्रिंसिपल डाक्टर रविन्दर के. तिक्कू होरें “सेवा पर्व” दे महत्त्व पर लौ पाई जेहदे नै समाज सेवा-समाज प्रति जिम्मेदारी ते पर्यावरण गी लेइयै विद्यार्थियें च जागरुकता बधाने च मदद थ्होंदी ऐ।

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू “सेवा पर्व 2025” दे सिलसिले च आत्मनिर्भर भारत विषय पर 30एं मिन्टे दी इक विशेष परिचर्चा प्रसारित करने जा रदा ऐ। कल बुधवारें 24 सितम्बर गी प्रसारत होने आहली इस परिचर्चा च स्हाड़े परौहने होगन उद्योग ते बपार मैहकमे दे निदेशक अरुण मन्हास जेहड़े इस विषय पर तफसीली जानकारी देने दे कन्नो-कन्नी एहदे बक्ख-बक्ख पैहलुएं पर चर्चा बी करगन। इंदे कन्नै गल्लबात करगन स्हाड़ियां न्यूज एंकर श्रूति खजूरिया ते अभिलाषा शर्मा। चेता रक्खयो कल, बुधवारे 24 सितम्बर दिने साढ़े 12 बजे- स्हाड़े इस्सै चैनल पर मीडियम वेव 303 मीटर यानी 990 किलोहर्ट्स ते एफ.एम. 100 इशारिया 3 मैगाहर्ट्स पर।

<><><><><><>